

Epeso Vegenalitini Luhuva Pauló Gizo Kimimó

Epeso vegená nónohá kimike gizo kimi gakó

1 ^{1^a} Neza Paulona Ómasímini gakotó Izesu Kilistoni aposolo loló utímina Epeso numutoka monó gele vegená Izesu Kilistoni monokú alévolé iki miniaká nia vegená lekeza luhuva netá imane gizo nolukumuve. ² Ameteho Ómasi itó Guivahanite Izesu Kilistó aitokatí nasahilí itó hulu lekelitoka mino moloko minatize.

Kilistotoka gímizunimómave loko monó lusa haitopaitolímíni lehizeletamó

³ Guivahanite Izesu Kilistoni amelaho Ómasi áisi nene nónohá zeletake okulumakutí monó lusa haitopaitolímíni Kilistotoka voko gímizunimómave loko lehizeletamó. Lehizelimikumú geké lotatunize. ⁴ Áisi nene gozapá ká eláa mikasímini guhaiváa utó onamigo ezáa avogisalo apazá etó iki keké vizikigó minatave loko Kilistotoka miní amitave loko lelémo etó imó. Lá ike, agika limike, ⁵ ganatilisí gelekago minakumule loko Izesu Kilistoni nasahilí oletake kelémo lá okugo aí izegipala minatave loko lo hutamó. ⁶ Eza gipala gihila áisi lapanalagi nasahililagímo hagitana oko lehizeletamó. Nenemú geké lotoko minatune. ^{7^b} Izesú eza golanivatunú meinavate hizelimiake gologí oletake golesa netate gilatoletamó. Nenémini nasahililáa lelitoka ohunagi minokave. ⁸ Nene avevezahaló ohunagú ligikagú luhuvagi itó geleaká gihiláa napa oko leke vizeletamó. ⁹ Lá ike ezáa agikatunú gele minamómámini asuguná gakó ganatilisí geleake láa loko lo hukoletake ale vesamá okave: ¹⁰ Eza gamenamú giligo minamó nene alitokiko Kilistó nene netá matá mukí okulumakú neha itó mikasiuka neha ale nupa napa nenémini gotoláa loló itive loko lo molamó.

¹¹ Itó netá matá mukí nene Ómasímo ezáa agikatunú gilike lo hukató aleaká noi ve áisi gozapá ganá agata gilike lo hukóletató monó

^a 1:1 Apo 18:19-21, 19:1 ^b 1:7 Kolo 1:14

helisa henoni ali alitave loko lelémo etó imó. ¹²Nenemú ganá apí oko Kilistokumú lagata losi gelemoko ageva oaká uni vejená leza Ómasímini lapaná ale oteko minatune. ¹³Itó lekeza ámina iki gako gihiláa lukugutó vizi gako lamaná nene giliake, Kilistokumú gili alévolé ikago, lo mololetató nene Sikalahú ganatili lehzelikimikago Ómasímini anosagi lílí inamóma neve. ¹⁴Okulumakú Ómasímini monó helisa henoni ali lá itave loko gozapá lo huko mololetamómámini zazaváa nene Sikalahú lehizeletamó. Itó aí vejenala zuha lelí meina hizelimiaká hozaváa apí imó nene aleloko voko ale lutiginogo ive. Nenémini mogonáa gele vevesatune loko Sikalahulímini anosagi nominune. Nenemú Ómasímini lapaná ale oteko minatune.

Epeso vejenakumú Ómasiloka limó

¹⁵Nenemú lekeza Guivahani Izesukumú gili alévolé iake monó vejená likigivetikini likigika kimiaká niamómámini gakola gelekukeve loko, ¹⁶lekelikumú Ómasi agepoka loaká noumú nene ahulosá amuve. Lekelikumú láa loko Ómasiloka loaká nouve: ¹⁷Guivahanite Izesu Kilistoni amelaho lapanalímini amelaho Ómasi áisi nene Sikalahú lehizeleketoko likigika alémo vávani okoko Guivahanímini mogonáa lo lekemekiko gili guni iki netá mogonamú gili vevesiki gilitaze. ¹⁸Lá niiki likigika lakagata ale koló okiko, Guivahanímo lekelémo otopá zimómave loko okulumakú gonanalísímú lakagata losi gelemiki ageva iaká nia netakumú gilitave. Itó vejenala zuha lekeza monó helisa henoni asaivagi ali lá itakumú gilitave. ¹⁹Itó leza gele alévolé uhatoka amuza sipisi alévolé helisatunú hoza aleaká noimó nenémini napavamú gilitave loko Ómasiloka loaká nouve. ²⁰^c Ámina alévolé zámuza sipisitunú nene Kilistó hilikutí mómoká oko alémo oteake okulumakú agizani lamagaloka alémo molokago, ²¹kiapege itó gamani itó ve napa itó amuza ve iti minamó haitopaitolímini keí ve uvóipo ahulokimikago mina vejenalitini kugulizá nene lemeko noigo, aí agulizaláa mino veletó oko neve. Itó itínasagó nomive. Alike utó iti gamenaló iteko minanogo ive. ²²^d Itó Ómasímo netá matá mukí nene Izesuni heumauka mulisi moloketake ámina netalímini gotóini loló itive loko hize otemiake vejenala zuha lelitoka alémo molamó. ²³Itó monó guluni vejená leza Izesuni agupe makó loló okuko lelitoka gizapa noletago, netá matá mukilímini agikagú mino váf oko noi vémini agikagú minoko aleko oaká noune.

Lemeni heleneikutí lelémo mómoká imó

2 ¹^e Lekeza gozapá nene hokolizá pakalizá iki lihimatinigi minikagove liki lekemeni hele vimó minamole. ²Nene gamenaló nene lekeza

^c 1:20 Age 110:1 ^d 1:22 Age 8:6; Kolo 1:18 ^e 2:1 Kolo 2:13

mikasímuni gapo golesagú nivake, vogalaló zámuzagi netá matalímuni gizapa ve golesaló gímiziake ámegetiaká amó. Aí ametamenímo itína gamena nene Ómasímuni gakola pelevesava ziaká a vegeatoka hoza aleaká noive. ³Leza gozapá kezagitana oko minunike, litaha ligikámuni lagaváa ámegetoko loló oko lugupémuni itó geleakalímuni gakoláa gele alekunike, vegeaná lugáa minamó nenéminoko Ómasímuni mesahaváámuni mututoni loló unimó. ⁴Lá oko minuháza, Ómasi áisi nasahilila mukí minokagove loko nasahilí sipisi oletake agika limimó. ⁵Lihimategi minunitímo lemeni heleloko vimó nominuko, Kilistogegi lelémó mómoká okago, otunimó. Gilinahe. Ómasímuni nasahililatunú lugutó vizimó. ⁶Itó Izesu Kilistotoka lelémó gímizekago ligikáa lemenífatunú áisigi mota okulumakú minoko aleko oaká nounimó gelekave. ⁷Nene alika gamenaló utó omo omo iti gamenaló nene agika hize limike Izesu Kilistoni nasahilila ohunagi limimó nene ale vesamá oletanogo lá imó neve. ⁸Gilinahe. Eza lugutó vizimó nene aí nasahilitunú neve, itó Izesunimú gele alévolé unimómave loko neve. Nene lelí amuzatunú nomive. Ómasímo hagitana lehizeletamó. ⁹Nana hoza ale minuko nenémini oletamó neve. Nene ma nomive. Nenemú lugupe aleko iteakaláa nomive. ¹⁰Leza Ómasímuni agizani luhuva nouko, ezáa Izesu Kilistotoka miní amunikeve loko mogona lamaná lilí itave loko lelémó utó molamó. Itó neneló lisi lisi iki vitave loko gozapá ámina gapo veletamóma neve.

Kilistotoka miní amunikumule loko lelémó hamó onoimó

¹¹Lekeza gozapá hetoka vegeaná minamó. Itó Zuta vegeaná keza kugupéitó Ómasímuni anosagi minamó nenete lekelikumú aliki mumusopa ziki anosagi nomi vegeaná niave liki liaká amóza, ha kugupémuni anosamú linamóma neve. ¹²Nene gamenaló lekeza Kilistogegi apiziki minamake otopá ziki minamó neve. Itó Isilae vegeaná lelí mulusigú minamake, lekeza hanuva gutá minamó neve. Itó Isilae vegeaná kelémó molokago keza lo múnahi gakó lo moloketamó nene ali minikago, lekeza amegesaloka minamó. Imane mikasiuka nene netá gihilamú ageva gemake Ómasigi minamamóza, ¹³nene gamenaló lekeza hotoka gihisigú minakutí itína gamena nene Izesutoka miní ameke Kilistoni golanímo geisa mikú lekelémó molokago imi anitiki niave. ¹⁴Ezáa nene nonagá itave loko lelémó apizeaká ve noive. Itó leza Zuta vegeniki lekeza hetoka vegeniki holutegú logoka hotopotó okago minuhalímuni geisa nene aleko tele vizeake lelémó hamokú molamó neve. ^{15f}Itó Mosé lo hukoko li gakolímuni agikagú nene alilo alemilo liki haitopaitó gakó linamó nene ezáa agupe ahulake mukitó ipá oko ale ahulokamóma neve. Lá oake, Zuta vegeniki hetoka vegeniki mulusi

^f 2:15 Kolo 2:14

lositá lelí holutegú minoko aitoka gímizunimómave loko ezáa lelémo gosohá vejená hamokó loló oake minake nonagá ale utó imó. ^{16 s} Eza zohota zaló nohilike, vejená mulisi lositá lelí lovasava oko minunimó nene apele heleake, Ómasigi lelémo mukipa imó. ^{17 h} Lá oake, gihisigú minamó hetoka vejená lekeza itó geisa mikú minunimó Zuta vejená leza mukitoka hulúmini gakó lo lemekago gelekune. ¹⁸ Lá oake, gapo velelimikago, leza Zuta vejenaki itó lekeza hetoka vejenaki Sikalahú hámakólímo gapo velelimikago, ameteho noitoka vo anitesá neve. ¹⁹ Nenemú itínasa gamenaló nene lekeza hanuva hepelaloka gutá ve minamave. Lekezagi monó vejená lugáagi Ómasímíni apá amelage nune. Itó Ómasímíni vejenala zuha loló oko nune. ²⁰ Aposolo itó Ómasímíni agepagutí gakó loaká ve leza lukesava loló oko nouko, nenetini lumupiló hize lé olikimikago miniliki viki niave. Itó Izesu Kilistó nene numuni lapusaváa loló oko noive. ²¹ Numutó namató vejená Guivahaniloka miní amekuko, aí apazá zagusave utó oloko voko napa oaká noive. ²² Sikalahú nenémo lekezagi ámina oko aitoka lekelémo miní amekago, Ómasímíni numuni apá lilí ikago mulutikú minoko aleko oaká noive.

Pauló hetoka vejenakumule loko monó hoza alimó

3 ¹ Itó neza Paulona nenemú hetoka vejená lekelikumule loko Izesu Kilistoni gelekeleláa minuke nagá numukú nouve. ² Lekeza nenikumú nene Ómasímo nasahililatunú oko lekelitoka monó hoza alitane loko lonetonoimóma neve liki gilinave loko gelenouve. ³ Eza asuguná gakó amegesáa lo utó moloko lo nimimó neve liki mota gilinave. Ámina netakumú goí oko gakó alínipáisi gizo lukumumóma neve. ^{4 i} Lekeza ámina gakó gatiki nigiliki neza Izesu Kilistoni asuguná gakó amegesáa nene nigikatunú gele vevesoko gelekuke ángoaká umoláa lekeza gilitave loko vesamá oko ámina luhuva gizo lukumumóma neve. ⁵ Ámina asuguná gakó amegesáa nene gozapá miniliki va vejenatoka utó amimóma neve. Apazá aposolo itó Ómasímíni agepagutí gakó liaká ve lelitoka alika Sikalahulímo lo utó moloko limimó nene láa loko neve: ⁶ Gakó lamaná lo molamó nenémini gihiláa nene Zuta vejená minamamolaloka itó Zuta vejená lelitoka hámakó avevezahaló mulusi hámakó loló oko mininake Izesu Kilistokumule loko lehizeleketatove loko lo mololeta netá izá moloko alekuko lelí mututoni itive loko lonoimóma neve.

⁷ Itó ámina gakó lamanalímíni gelekeleláa loló itane loko Ómasímo nasahililatunú oko aí zámuzaló moloko gele minake nenitoka ale utó molonoimóma neve. ⁸ Monó gele vejená limiki minakutí neza lemeko

^s 2:16 Kolo 1:20 ^h 2:17 Isa 57:19 ⁱ 3:4 Kolo 1:26-27

minumolámina Kilistotokatí minumuni gatoko gato asú amoakalímuni noimó nenémuni gako lamaná nene Zuta vejená minamamoláa lo utó moloko lo kimitane loko nenémuni hoza gako lonetonoimóma neve. ⁹Ómasímuni asuguná gako amegesáa nenéminoko hozaváa aleko ale asú itove loko agata gili mogona nene neza lo utó molokugo vejená mukitoka gilitave loko lonetonoimóma neve. Nene Ómasi eza netá matá mukí ale utó onoi vémo ámina asuguná gako amegesáa nene ezáa agikagukó halá geloko voko minamó. ¹⁰Láa loko Ómasímo agikatunú gilimó gihiláa nene Ómasímuni vejenala zuha leza itína ale vesamá okuko, Ómasímuni gele vevesoakaláa haitopaitolímuni nene okulumakú agelóini kugulizaki ve niamó itó amuzáiki ve niamó keza ángiiki gili guni itave loko halá geloko voko minamó nene, ¹¹Ómasímo eza gozapá netá matá ale utó onamike agikatunú lo huko mololoko iteko minamó nenémuni gihiláa nene Guivahanite Izesu Kilistoni amiselekago ale utó molamó. ¹²Aikumú gele alévolé okuko gapo veleko lovolovo zeletamó nenemú lelegesá legemiko Ómasímuni avogisaló vitune. ¹³Nenemú láa loko lo likimitoze, gililo. Neza lekelikumule loko gasovagi netalímuni amupiló nominugoma, likigika lememino. Lekeza nenemú giliko gonanalisi netatini loló ino.

Kilistó agika limitímuni mogona gilitave loko Ómasiloka limó

¹⁴⁻¹⁵Nenemú nene okulumakú miniliki vamó itó mikasiuka minoloko vunimó mukilitini ametehe gihila aí nalapusa hizeko gupá ze ameko lekelikumú numuna láa loko loaká nouve: ¹⁶Ómasímo eza ohunagi lapanalatunú Sikalahutoka lokago lemeko zámua ale utó mololikimikiko, likigikatini napa alévolé itive loko, ¹⁷itó Kilistokumú gili alévolé iminatímo eza mulutikú minoko aleko itive loko, itó agika likimitímo luhusatini ale gilitoko lukesalini loló okiko, ¹⁸lekezagi itó monó gilina vejená lugáa mukitoka kezagi Kilistó agika limimó nenémo livilege zaká maká oaká noikumú gili guni iki gilitave loko, ¹⁹itó Kilistó agika limimó nenémuni mogonáa nenémo vejenalita geleaká nene avilege zaká maká oko nemó nenemú hanuva gili guni ikiko, Ómasímuni agikagú laga netá vaí oko noimó nene lekezatini likigikagú vaí oko minative loko Ómasiloka loaká nouve.

²⁰Ómasi eza ligikagú hoza aleaká noi zámuzalatunú eza oko moloko oaká noitímo loká oaká nouni netá itó lagata geleaká nouni netá avilege zaká maká oko golivagi netá loló iti vémini luhuva hutilí ino. ²¹Aí vejenala zuhalita oko moloko itunimó itó Izesu Kilistó oko moloko noimó nenémo Ómasi geké lotatunimó nene omolelé amalelé oko lagapilamotoka minoloko iteko minino. Lamaná.

Sikalahulímo lelémo hamó ikú minatune

4 ¹Neza Guivahanimule loko nagá numukú noutímuna lakagata aleko lo likimitoze. Ómasímo iteko mina netató sele lo likimimó nenémuni

sisihetokó miniki aliki ilo. ^{2j} Lá niiki likigika aliliki limiki mulutikú geha ziko hulugú miniki goselé likipiliti netá alilikitatakumú goselé lekepelemiko legeso iki likigika kimiki minalo. ³ Itó hulúmini nagalatunú múnahelaketamóma neve. Nenemú ámina nagá hukikataze, eza gizapa otiko eza gizapa otiko iki Sikalahulímo lekelémo hamó ikú nene minalo. ⁴ Ómasímo okulumakú helisa henoni hámakokumú lakagata losi gelemiki ageva iki minatave loko sele lo lekemeneimómáminoko mulusi hámakó nouhá itó Sikalahú hámakó neve. ⁵ Guivahani hámakó noive, itó monó hámakokumú gele alévolé oaká nouhá, itó monó nagamí hámakó holoaká nune. ⁶ Itó mukitó ametho Ómasi hámakó noive. Áisi monéna mukitoka livilege zaká maká oko noive. Itó etó etó oko zámuzá limike hize lé olimikago aí hozaváa aleaká nune. Itó eza mulutegú etó etó oko minoko aleko oaká noive. ⁷ Kilistó eza lehizeleta polosava monolímíni zámuzá etó etó oko ale minoaká nune. ^{8k} Nenemú nene monó gotolaú luhuva gakó makó láa loko neve: Eza veletoka mezane noitike nagá numukú minamoláa kigizató alike kelémo otimó neve. Itó monolímíni zámuzalá nene vejená lehizeletamóma neve.

⁹ Veletoka itimó nenémíni mognóáa lá oko neitive. Eza mikasi agikagú lemeneikutí atiginá oko itimó. ¹⁰ Itó ámina limi ve nenémo atiginá oko okulumá avilegemo avilegemo itimó nene aí ametamenímo okulumakuki itó mikasiguki mino gikí oko minative loko iti ve noive. ¹¹ Itó monolímíni zámuzá lehizeletamó nene vejená lugáa nene aposolo lelémo molamóma neve. Itó lugáa nene Ómasímíni agepagutí gakó liaká ve itó lugáa nene Izesuni gakó lamaná li hutilí iaká ve itó lugáa pastoli ve itó monó tisa, ¹² keza monó gilina gevená mukitoka kelémo vatí ikiko keza monolímíni gelekeleléa minatave loko itó Kilistoni mulusi leza monokú voko napa itune loko vejená nenéminoko lelémo molamóma neve. ¹³ Lá oká lá oká oko hozaváa aluko gele alévolé oakate itó Ómasímíni gipalámíni mognóáa geleakate nene hutilí iko ligika hámakó miniko monokú alévolé oko Kilistoni ametamenigitana ale luhokinake napa oloko ititune loko ámina zámuzá lehizeletonoimóma neve. ¹⁴ Itó lá okiko leza namuni molokoko minaminake amuzá moloko nouko logoka viziaká ve keza soza sazagi li limikiko, soza saza gakóinímíni hepeláámo lelémo mómoká okiko neneló gímizitupe neneló gímizitupe lokatunize. ¹⁵ Leza ligika kemeko gakó gihiláa loloko vinake matute loló oko noi ve Kilistotoka gímizekinake alévolé itune. ^{16l} Aitoka miní amekuko amelaho vémo múnahé lamaná olimikiko apize lamaná oko mininake aí agupémíni gelekelela mininake agisa agizani loló itunize. Lá noinake zámuzá limi avotigí alenounimó neneló moloko lamaná oko hozaváa alinake ligika kemeakalímíni nasahilikú napa oloko vitunize.

^j 4:2 Kolo 3:12-13 ^k 4:8 Age 68:18 ^l 4:16 Kolo 2:19

Litaha lemetameni ahulokinake gosohá lemetameni ale luhatune

¹⁷Nenemú neza Guivahanímini avogisalo lakagata aleko lo likimitoze, gililo. Hetoka vejená lugáa keza kagata giliaká niamó nene ha netakumukó giliaká niave. Keikitana iki miniki aliki amilo. ¹⁸Keza nene kigika kagata koló amigo negi nagi hiziki kigika hize lí okago niakumú Ómasilokatí alévolé kemetameni alita netá kemegeza amikave. ¹⁹Itó kigikáini hize lí okago netá golesamú kovoza ma helesá amigo, mokoló netalímini agikagú niake, golotuva netá haitopaitolímínimú kumu helekago goselé kepelemigo líl iaká niave. ²⁰Lekelisi nenéminiki minatave loko Kilistoni mogona lo lekemesá amuháma neve. ²¹Aí mogonáa lo lekemenouháma neve. Itó Kilistotoka viki gímizikago aitokatí gakó gihiláa lainim-oleketuko gilinamóma neve. ²²^m Litaha lekemetamenigi miniki aliki iaká ago itó lukumu hilimó nenémo soza lokoko lokogoka vizekego lapuluva oaká imó nenazo, ámina litaha likigikama gololohá ilo. ²³Itó likigika lakagata alémo gosohá líl ikiko minino. ²⁴ⁿ Ómasímo gosohá lekemetameni ale utó imó nene ezáa ametamenigi miniiki hee hee loko minoaká itó etó oko keké vizeko minoaká netá ali utó milata lekemetameni nene ali luhalo.

²⁵^o Nenemú lekeza soza saza ahulalo. Leza apize lamaná unike aí nagá loló okuháma nenazo, nenemú gakó lamanakó eza lo amiko eza lo amiko iki minalo. ²⁶^p Mesahagú miniki lihima alikataze. Mesaha oká likizapaló moloká iki niko ho nene lememino. ²⁷Lá itamó nene Satani nene gahe sigitaminigave. ²⁸Gumina aliaká a vejenalita ámina netá ahuliiki likigizanitunú hozaváa amuza miliki aliiki nosánetatini henokanotini ali utó miliki vejená ámemena nasahílí okekatune liki ámina zámuzagi minalo. ²⁹Ulínaka gakó lekegepagutí makó lamilo. Gakotini gilita vejená kelémo lamaná itune liki gakó lamanakó liki eza hize lé otiko eza hize lé otiko oaká gapomú vitagá ilo. ³⁰Ómasímini Sikalahú nene nemú manamú liki ahelukalú amilo. Aí nene gamena napaló nene asele zeletatimó nenémini zazaváa minative loko lehizeletoimóma neve. ³¹Ekesá gakó mesaha gakó mukahá gakó itó vivi vovoga aleko letovo oaká gakó nuvane giliki gili ahulalo. Itó lova likigika amino. Itó likizapaló molamino. ³²^q Lekeza likigika geha ziko likigika eza amiko eza amiko iki apizi lamaná iki minalo. Ómasímo Kilistokumule loko lihimavatini ahuloleketamómáminiki eza lihimavala ahulotiko eza lihimavala ahulotiko iki minalo.

^m 4:22 Kolo 3:9 ⁿ 4:24 Kolo 3:10 ^o 4:25 Zak 8:16 ^p 4:26 Age 4:4 ^q 4:32 Kolo 3:13

Lapanalímíni luhuva loló inake nenémíni avevezahaló minatune

5 ¹Lekeza Ómasímini izegipa gihila minatita aí avevezahaló minalo. ² Lá níiki likigika kemeakalímíni agikagú miniki aliki ilo. Kilistó eza ámina oko agika limike lelikumule loko agupéa latila imó nene Ómasi guguni gizo amigo Ómasímo anuva giligo lamaná imó neve.

³Lekeza monó vejená nianazo, mokoló netá itó musi netá itó mulutikú nihunihi nene lekelí holutikú utó amino. ⁴Itó ulínaka negi gakó giza zohí gakó golesa litamó nene etaminogo inazo, ámina netá ahuliiki Ómasi agepoka liki minalo. ⁵Lekeza láa liki gili alévolé iki gili minalo: Mokoló vehe itó musi netató vehe itó mulúikú nihunihuló ve mulutikú nihunihi nenémo soza ómai netá ámegetoakaláa geleneimó nenazo, ve nenémináa keza Kilistoni itó Ómasímini avogisaló miniki aliki ita netakumú nene vitagá itamóza, ma aleminigave. ⁶Golesa netá nenémináamú nene Ómasi gili amema vejenatoka Ómasímini mesaha utó inogo inazo, lokogoka viziki lekelitoka soza saza gakó li likimikikoma, giliko gihiláa loló amino. ⁷Nenemú lekeza vejená nenémináagi mini apiziki minamilo. ⁸Lekeza gozapá límugusigú minamóma nemóza, itína nene Guivahaniloka gímiziake lapanatinigi lilí iake niave. Nenemú lapanalímíni luhuvaváa lilí iiki nenémíni avevezahaló minalo. ⁹Lapanalímíni gihiláa lá oko utó oaká noive: Ligika lamanaki minoaká itó hee loko minoaká itó gakó gihila loaká, ¹⁰nene netá matá oko moloko itune loko Guivahanímo giliko lamaná iti netakumukó vitagá ilo. ¹¹Lugáate límugusímini netala itó hutuváa lilí nikoma kezagi mini apiziki minamilo. Lekeza ámina netá golesáini nene ali hanatalo. ¹²Netá asugunatoka aliaká niamó nene lovoza heleaká netá nenazo, nene gakó lamitune. ¹³Netá nenémináa ale hanatokuko, lapanalímo hize hanatokiko, utó o lamaná inogo ive. ¹⁴Itó utó oaká netá nenémináamo nene lapanaki loló itimó neve. Nenemú monó gakó makó láa loko nemóma neve:

Lokovó akina ve lekeza otilo.

Itó hilinita ve lekeza mómoká iki otilo.

Kilistó nene hize hanatoleketanogo ive
liki luhuva gizinamóma neve.

¹⁵Nenemú lekeza miniki aliki itatoka nene gizapa etoha iki minalo. Itó negi nagi hiziki minamiki gili vevesiki minalo. ¹⁶ Itína gamena nene golesa netalímo hutilí onoinazo, nenemú netá lamaná aleaká gamena utó olikimitimó nene ma likivilegemino. Gamena ha okatize. ¹⁷Negi nagi netá lilí iki minamiki, Guivahanímo lititoka molatitoka iti gapomú vitagá ilo.

¹⁸Piá nagamikumú lekemeni zemilo. Nenémo nene likigikatini ale gopa okatize. Ómasímini Sikalahú nene likigikagú mino vaí ino. ¹⁹ Ómasi

^r 5:2 Gá 29:18 ^s 5:16 Kolo 4:5 ^t 5:19 Kolo 3:16-17

agepoka lili iki ipá apá nama itó monó nama itó Sikalahulímo lekelémo vávani iko gosohá nama eza lo amiko eza lo amiko iki likigikagú Guivahani agepoka li amiki nama liki lokogoliza vizí vizí iki minalo. ²⁰Lá niiki Guivahanite Izesu Kilistoni agulizá iki mukí netakumú gamena gamena Ómasi ametehini agepoka lili iki minalo.

Ve aleve iki miliki ita gakó

²¹Lekeza Kilistoni goliva gilitiki eza gelekelé otiko eza gelekelé otiko ilo. ²²^u Vená lekeza vatinitini kagahaisiuka niminiki Guivahanímini agahaisiuka niminamó loló ino. ²³Kilistó eza vevenala zuhatini gotóini minake ale nupa oko gizapa olimiaká noive. Agisa agizani agupéa leza nene nouko eza lugutó vizeaká ve noive. Vená keza ámina iki váinitini kigínaló niave. ²⁴Nenemú Ómasímini vevenala zuhate Kilistoni agínaló niamó ámináminiki venatini nenete minimi limiki váinitini kagahaisiuka minataze. ²⁵^v Ve lekeza venatini nene likigika kimitamó nene Kilistó monó gele gevenakumule loko agika limike agupe latila ike hilimómáminiki likigika kimilo. ²⁶Kilistó lá imó nene vevenala zuha kelémo etó okiko golotuva netá keitoka minokative loko itó monó gakolatunú nagamí zekoko lusa gekiko ²⁷ezáaloka ale akolotake likigika gizopa lo minikogó lihima nomimó etó ikigó minatave loko hilimó neve. ²⁸Itó ve lekeza lekezatini lukugupemú miluma giliaká niamó ámináminiki venatinimú milumáini giliki likigika kimilo. Lekelikutí makolímohé makolímohé venalamú miluma geleko agika amitimó nene ezáa agupemú nene miluma giliti netá loló inogo ive. Ve makolite kugupenini mukahá apilisá amave. ²⁹⁻³⁰Leza lugupeva gizapa lamaná otunike nosánetá amekogó minoaká nune. Leza Kilistoni agupe agisa agizani nekisáa nounimómave loko aí vevenala zuha ámináminoko gizapa olimiaká noive. ³¹^w Nenemú monó gotolaú gakó makó lá oko neve: Ve makolímohé makolímohé izolahiko amelahiko ahulokimioko venalaloka voko gímizekiko keza kugupe kigika mili hámakó iki minatáive. ³²Itó ámina gakó amegesáa halá ge minamó nene Kilistó itó vevenala zuhaloka voko alekative loko noluve. ³³Nenemú ve lekeza mukitó nene lukugupelinimú giliaká niamó ámináminiki venatinimú giliki likigika kimilo. Itó vená lekeza mukitó nene vatini kugulizáini ali otiki kilími napa ilo.

Izegipagi izóike améike iki miliki ita gakó

6 ^{1x} Mohó gipa lekeza Guivahanimule liki izotikini ametikini gelekelé ikitiki keí gakóini gili alilo. Nenémo nene lekelé gapo loló onoive. ^{2y}

^u 5:22 Kolo 3:18; 1 Pit 3:1 ^v 5:25 Kolo 3:19; 1 Pit 3:7 ^w 5:31 Apí 2:24 ^x 6:1 Kolo 3:20
^y 6:2-3 Gá 20:12; Gapo 5:16

Geza izokahiko amekahiko kugulizá ale otezo loko li gakolímó gapo lota gakokutí nene ámina gakotó ganá miní ameko lo mololetamómági neve. Láa loko lo mololetamóma neve: ³Lá itanimó nene mikasigú mino lamaná oko gamena hána mino-loko voko minanogo ane, loko lonoimóma neve. ⁴ Itó izóikita améikita lekeza nene mohotini izegipatini keza kizapaló molati netá lilí ikitamilo. Guivahanímini monokú kagata aliki kilími hee hee liki gakó gilitave liki kagavutó zilo. Lá iki gizapa nikitiko monó gapogú viki napa itaze.

Gelekelé vegenaki kugulizaki vegi iki miliki ita gakó

⁵ Gelekelé izegipa lekeza mikasiuka kugulizaki velini gelekelé ikitiki gakóini gili aliiki likigika lamaná ominiko lá ikitalo. Lá niikoma Kilistoni gelekelé nitamó nene gilinogo ive. Itó keikumú giliko gena noikoma legesó iki miniki gakóini gililo. ⁶ Lekeza nene kugulizaki velini lukugupe lekememi kimiiki gelekelé nikitiko hanuva lelí ániigi lamaná itave likigopa, leza Kilistoni gelekelé nenémináa minatune liiki Ómasímó lititoka molatitoka iki lá ilo. ⁷ Vegenakumú hoza nalune likigopa, Guivahanímú nalune liiki mulutikú lamaná giliiki hoza goselekaselé amiki alilo. ⁸ Lá niiki gelekelé izegipa niamó itó kugulizaki ve lilí iki niamó keza mogona lamaná lilí iki minatamó nene, Guivahanímó nenémini helegáa ámináminoko meinaváa kiminogo ive liki gili minalo. ⁹ Itó lukugulizaki ve lekeza gelekelé izegipatini nene ámina iki kilími lamaná iiki gamuni iki ahulikitalo. Lá niiki láa liki gililo: Gelekelé izegipatinigi itó lekezagi nene okulumakú Guivahani ametipo hamokó noive. Eza itiki minamó limiki minamó mukikumú giligo hamó lelegitokó niave.

Ómasilokatí gimisi magé lova netá ale ligizakú molatune

¹⁰ Lo asú oko litoze. Guivahaniloka viki gímiziiki aí zámuzá napa lekelitoka neiko nenémini agikagú miniliki viki alévolé ilo. ¹¹ Satá nene asugunatoka logoka vizeaká suni alinogo noiko nene helisa aliiki nitatotí nene amisele ahulatune liki Ómasilokatí gimisi magé lova netá ale likigizakú miliiki gizapa iki minalo. ¹² Leza hanuva lugupegi vegenaki lovasava osá amune. Kugulizaki ve napa itó guivahani alévoleláa imane límugusi gamenaló gizapa ve niamó kugupe nomimó ániigamoakalímini golesa netá okulumá sepenauka niamó kéisi lova ali limiaká niave. ¹³ Lá niamó nenazo, nenemú lekeza Ómasilokatí gimisi magé lova netá ali asú iki miniiki lova golesaló amuzá miliki niko gala ve keza iki lou niiki vikiko lova hizi asú itató nene lekeza áminaló alévolé iki minanigave. ¹⁴ Lekeza lá iki otiiki minatave loko noluve: Gakó gihaláa getelini

² 6:4 Kolo 3:21 ^a 6:5-8 Kolo 3:22-25 ^b 6:9 Kolo 4:1 ^c 6:14 Isa 11:5, 59:17

loló noiko, Ómasímini avogisaló lihimatini asú olikimikago minatamó nenémo apitiniló geha sioti loló okiko ali luhiiki minalo. ¹⁵^d Hulúmini gako lamaná ali guni iki ali minatamó nenémo likigisa suú loló okiko lisi gikitiiki minalo. ¹⁶Lá niiki izolahináa napa nene Ómasimú gele alévolé atímo lagelini loló okiko, gamena gamena likigínagú miliiki niko, golesa netalímini amelahóa gimisivagutí magelámo satokiko magelímini loláa lihatize. ¹⁷^e Lá noiko, aenitunú akilitini agulizaláa lekelémo lukugutó vizeaká netá nene ali hitiiki Sikalahutokatí Ómasímini gako nenémo sopoló hánalini loló okiko ali minalo. ¹⁸Lekeza gamena gamena Sikalahulímo lekegepa ale vávani noiko Ómasiloka miní ami amiki liki voká liki minalo. Itó zozozogo vizemiki goselé lekepelemiko gizapa iki minalo. Lá niiki monó gele vejená mukitoka keikumú numuna hoza alilo. ¹⁹Lá niiki nenikumú nene Guivahanímo negepáne ale vávani okiko Izesuni gako lamaná goí oko asuguná oko minamó nene negepa atilinake vávani oko lo utó molative liki lekeza numuna lilo. ²⁰Neza ámina gako lamanakumule loko gako lo utó utó ve nagá numukú noutímina Ómasímo lonetatíminoko nelegesá legemiko lo utó molative liki nenikumú Ómasiloka lilo.

Gekéini loketamó

²¹^f Minoko aleko noumó nenémini mogaána itó hozaváa aleaká noumó nenemú gilitave loko Tikikó nene voko gako lo likiminogo ive. Eza ligiviteho gihila Guivahanímini gelekelé izegipala hozagú alévolé oko mina ve ²²^g áisi lelí gako láate lo lekemeko mulutikú ale lamaná itive loko amiselekugo núane novive.

²³Ómasi ameteho itó Guivahani Izesu Kilistó áisi nigive nagave hulu ale utó mololeketoko gele alévolé oakatini ale hutilí olikimiko likigika eza amiko eza amiko iki minatave loko noluve. ²⁴Guivahanite Izesu Kilistotoka gímizi lamaná iki likigika amiaká nia vejená lekelitoka Ómasímini nasahilí nenémo mino moloko minino.

^d 6:15 Isa 52:7 ^e 6:17 Isa 59:17 ^f 6:21 Apo 20:4; 2 Tim 4:12 ^g 6:22 Kolo 4:7-8